

Buwire á wakita na a puwatertaa Paul ge emnde a TAISALAUNIKI

Ga use á Paul

¹ Wakita na yá anƙwa puwaná ba iya Paul, nǎ antara Silwanus, ira Timaute. Nǎ anƙwa gaku use ge kure emnde á Dadaamiya an Yaakadada Yaisu *Almasiihu na kwá am larde á Taisalauniki na.

² Tara Eddemiya Dadaamiya tá an Yaakadada Yaisu Almasiihu a magarakuránmaga ngurna, a varakurteva hairire.

Shairiya á emnde vaci eptsá á Yaakadada Yaisu

³ Na baa ba kure egdzar mama-aha-aaruwa: Nere wá, ma vaatara keni sey nǎ yanka slafaná we á n̄ere ge Dadaamiya áƒaba kure. Una zlaya jipu, áƒaba farfe zlaƒe áƒaliye fetarfe á kure áte Yaisu *Almasiihu, háyáviŕe na am dagave á kure keni farfe ba kwakya.

⁴ Áƒaba una n̄anna, n̄ere nǎ higa á ba an higa ge ndaha labare á fetarfire á kure áza emnde á Dadaamiya baƒemme, áƒaba tá shakuru zlaƒa kwakya, aley gazlakurka ƒekid̄eki, kwá á ba an fetarfire á kure áte Yaisu Almasiihu.

⁵ Una n̄anna á maramiya shairiya á jirire na watse á se maganá Dadaamiya áte emnde na. Iyau, ba kwakyire á zlaƒa na kwá anƙwa ƒashaná kure kina na keni, á maramiya ba

duksa, geni kure hyaikurephye emnde a dem zlan̄na á Dadaamiya, zlan̄na na kwá an̄kwa b̄asha zlađa ad̄aba n̄ane na.

⁶ Una ba jirire, Dadaamiya wá, á de kyá shairiya-aara á ba áte jirire. N̄ane á de eptsaternaap̄tsa zlađa n̄anna ge emnde na tá an̄kwa magakurá palase kina na.

⁷ Amá kure emnde na kwá an̄kwa shá zlađa am erva-aatare kina na, antara n̄ere, ge miya wá, á de vamiteva puwansepuwe, má eptsap̄tsa Yaakadada Yaisu á sa am samaya antara malika-aha-aara tá an̄ d̄em̄d̄emire na.

⁸ Má watse á sáwá Yaakadada Yaisu n̄anna wá, á de sáwá am dagave á nara á kára yaikke, ge se kya shairiya á emnde na d̄abarka Dadaamiya, antara emnde na eksaranteka labare á higa, elva á Yaakadada á miya Yaisu na.

⁹ Ba seke bikere-aatare, Dadaamiya á de faterare laruwa yaikke, tá de njá am laruwa n̄anna ba ge d̄ekid̄eki, yiyiye an̄ n̄ane, tá de puweteka ice-aatare d̄ekid̄eki áte sleksire á Yaakadada á miya an̄ daradza-aara jipu na.

¹⁰ Bad̄emme á una-aha n̄anna á de magava ba vaci á eptsá á Yaakadada Yaisu á sa am samaya. Vacite n̄anna, bad̄emme á emnde na ta fetaare áte n̄ane wá, tá de gálá ba n̄ane á ba an̄ ká kwara, tá de ed̄ema bad̄emme. Daaci, kure wá, watse kwá an̄kwa am dagave á emnde n̄anna keni, ad̄aba eksakuranteksa elva-aara na ndza na balakursebale na.

¹¹ Ad̄aba una n̄anna wá, ma vaatara keni njá yanka n̄ála Dadaamiya ad̄aba kure. N̄á an̄kwa n̄ala ba n̄ane geni á gakuranvege zlalava á kure

áte una a dzerakurse geni kwá zlála estuwa. Ná anƙwa ɗala zlaɓe ádaliye geni a melakurumele ge mága názu kwá kátá maganá kure ge shagerire, antara slera na kwá anƙwa maganá adaba fetarfire á kure áte Yaisu *Almasiihu. Ná anƙwa ɗala zlaɓe geni a magakuránmaga unaha ɗanna an hakuma-aara.

¹² Daaci, adaba ɗgurna á tara Eddemiya Dadaamiya antara Yaakadada Yaisu Almasiihu na wá, bademme á emnde tá shánsha gálá Yaakadada Yaisu adaba kure. Kure keni, watse tá galakurgála emnde adaba ɗane.

2

Sesse á edda una zlazlafa hala-aara na lauktu á de sawa Yaisu

¹ Egdzar mama-aha-aaruwa, náwa názu yá kwarakursá ya áte sarte a eptsá á Yaakadada Yaisu *Almasiihu na, watse bademme á miya mí de jammeje ázeɗara na. Ná anƙwa ɗalakurɗala, taslawá á kure,

² ma a se bakurnaa ware geni hyephye sarte á tsekwa á Yaakadada keni, kure magauka najipu-aara emtsaade, gazlauka dekiɗeki. Una ma edda-aara a se balakurse am nabiyire, ma kwa cenanaa am waazu á malum-aha, bi watse á de bánba ura umele geni ndza a puwetaa ba Paul, dabauka kure dekiɗeki.

³ A keɗakuraaka ura umele ba dey sele, adaba vacite ɗanna á de sawka am tsekadɗire ba estuwa. Am sarte ɗanna, emnde kwakya watse tá de dzámka áte Dadaamiya dekiɗeki. Zlaɓe ádaliye keni sey má sesse edda una mándzawe

hala-aara na watse tá dá ba ɲane zuɲɲwe á dem tate á shá zladfa á emnde a mága haypa na.

⁴ Má sesse edda una mándzawe hala-aara ɲanna maa, watse á ganvege ire-aara ba seke Dadaamiya, watse á piyatertepiya ge emnde bademme geni a yaránya názu tá aɲkwa kezlán ugje na bademme, una ma emnde na tá aɲkwa kezlán ugje ge Dadaamiya an jirire na, ma emnde na tá kezlán ugje ge uwe keni, bademmire á emnde. De bá am mashidi á Dadaamiya na yaikke na keni, watse á naba duwa ɲane á de njá am huɖe-aara, geni emnde tá kezlán ugje ba ge ɲane palle na.

⁵ Ábi am sarte na yá ázekure keni, ndza ya ndakurnda duksa ɲanna bademme. Una ɲanna dedde am ire á kure emtu?

⁶ Amá kina wá, zlaɓe aɲkwa názu a piyetaa lámare ɲanna ge mágava kina. Kure keni diyakurdiya una ɲanna bademme. Estuwa, sey má hyephye sarte na a tsanaa Dadaamiya na, lauktu á de sesse edda una mándzawe hala-aara ɲanna áte parakkire.

⁷ Adaba ba kina na keni, ɲane á ba átira mága emtaɲkire-aara ɲanna am ervaunɖe á emnde kwakya, amá emnde ɲanna diyarka emtsaade. Watse á sawa, amá zlaɓe kineka emtsaade, sey má Dadaamiya ndansendahe ge edda una ni aɲkwa á piyantepiya na, geni a yanánya barama.

⁸ Am iga á una ɲanna wá, daaci á de sesse ɲane. Amá á se keɖanaakeɖa Yaakadada Yaisu *Almasiihu á ba an effeya na watse á segashe am mbuwe-aara na, má samsa ɲane an hákuma-

aara á sawa am samaya.

⁹ Sawa á edda á hala ñanna wá, watse an hákuma á Shaitaine, á se mára nalaama-aha gergere, an najipu-aha gergere, amá watse bademme ba fida.

¹⁰ Má samsa ñane wá, á se maga jeli á emtañkire gergere ge jateraa enkale ge emnde na tá áte unñule á kefa na. Daaci tá de kefa náza ba ge defekideki, adaba itare kwalarevkwale ge dába jirire, wayarteka geni jirire á lya ura am lámare ñanna.

¹¹ Adaba yarnaaya jirire á Dadaamiya na wá, Dadaamiya keni a naba magaa hákuma-aara áte itare, a hedateraa enkale, ta naba fetaare áte duksa na fida ba dey.

¹² Kwa cenánceneka-he una bademme? Daaci bademme á emnde na ervaunde-aatare yanaaya fetaare áte jirire, tá kátá mága ba emtañkire bademme na wá, tá de ñezleka vaci shairiya.

Dadaamiya a dzerakurse ge lyakurselye

¹³ Nere wá, ma vaatara keni ña yanka slafaná we ge Dadaamiya adaba kure, egdzar mama-aha-aaruwa. Dadaamiya wá, wayakurwaya, ndza a dzerakurse kwaye zlafe am fantaufe á duksa bademme, geni watse á lyakurselye an hakuma á Shedekwe Cudedfe. Estuwa a gakurvaa ñane emnde-aara, adaba kure eksakuranteksa jirire-aara.

¹⁴ Adaba una ñanna Dadaamiya a dakurte am sarte na ña de balakursaa labare á higa na. Daaci kure keni, watse kwá á ba an sledfe á kure ge higa antara Yaakadada Yaisu *Almasiihu am yaikkire-aara na an daradza jipu na.

¹⁵ Adaba una nanna, tsawaatse ba degdege am fetarfire á kure, egdzar mama-aha-aaruwa. Nawanaaŋa ba shagera názu ŋa kwarakursaa ŋere na bademme, ma una ndza ŋa kwarakurse á ba an we, ma una ndza ŋa puwakurte áte nalmesheri keni, a seska am ire á kure dekiŋeki.

¹⁶ Eddemiya Dadaamiya wayamiwaya. Am ŋurna-aara a naba vamite tsekadfire am ervaunŋe názá ba ge dekiŋeki, anŋkwa á melamiyumele ge fete táma á miya áte ŋane.

¹⁷ A fakuremfa ba ŋane palle, tá antara Yaakadada Yaisu Almasihu tsekadfire am er-vaunŋe; ma vaatara keni a varakurteva ba itare ndzedá ge ndáhá názu shagera, ma ge mága duksa jirire keni bademme.

3

Magaumága maduwa arge ŋere

¹ Anŋkwa duksa palle jauje, egdzar mama-aha-aaruwa: magaumága maduwa arge ŋere, geni a hyemhye elva á Yaakadada am slede bademme áte watsewatsire. Magaumága maduwa geni emnde keni a farfe zherwe áte elva á Yaakadada ba seke názá á kure.

² Zlaŋe ádaliye, ŋalaunála Dadaamiya geni a danjeremka am erva á emnde a mándzawe. Adaba tá anŋkwa emnde na yanaaya ervaunŋe-aatare fetaare áte Yaakadada.

³ Yaakadada á yakurka an ire á kure. Á de fakurma ba ŋane ndzedá am vuwa, á de tsu-fakurtsufa am masiba-aha na á de saná shaitaine á sete kure bademme na.

4 Nere keni a melaŋerwa ba Yaakadada geni a maganjerka shaige áte kure dekideki. Diyanjerdiya ganakini kwá anjwa maga ba názu ndza ŋa kwarakursekware na, diyanjerdiya geni kwá de yánka ma vaatara keni.

5 A melakurumele Yaakadada Yaisu *Almasiihu am ervaunđe á kure geni kwá diyeddiye háyáva na á wayakurá Dadaamiya an ŋane na. A melakurumele geni kure keni kwá gevge emnde á farvaunđe ba seke ŋane.

Shagera ma ware keni a emmága slera

6 Egdzar mama-aha-aaruwa, názu ŋá bakurná ŋere an zhera á Yaakadada Yaisu *Almasiihu wá, ŋá bakurá ba ni: má kwa naa ura fetarfe á maga masefire, ŋane cenaaka elva á ŋere na wá, ura estuwa, naba yawánya tate-aara.

7 Ba kure an ire á kure keni, diyakurdiya sera-aara bademme ge nja áte náza á ŋere. Adaba am sarte na ŋá ázekure na wá, maganjerka masefire dekideki.

8 Nere zanjerka dáfá áte ura ba dey. Nere keni ndza ŋá maga ba ŋgedepa á ŋere vayi vacika, geni a ganjerevka gwatame arge kure ge zanjeru náza za.

9 Una ŋanna keni ndza ŋá magán geni baaka hakuma á ŋere ge zá dáfá áte kureka. Amá ndza ŋa magán ge marakura gáráva shagera.

10 Am sarte na zlaŋe ŋá ázekure keni, ndza ŋa ndakurndaha bademme, a ba ŋere: Má edda-aara kwalekwale ge mága slera, a zeka dáfá keni.

11 Na ndahanaa adaba uwe una ŋanna? Adaba ŋá anjwa cena: tá anjwa emnde na wayarka

mága slera dekideki na am dagave á kure, slera-aatare ba dem elva-aha á emnde umele.

¹² Náwa elva na njá baterán ge jeba á emnde njanna an zhera á Yaakadada Yaisu *Almasiihu: Ekkure keni eksawanteksa mága enjkale, magaumága slera á kure ge gela ire á kure.

¹³ Daaci, egdzar mama-aha-aaruwa, kure wá, ma vaatara keni yawánka mága maggwire dekideki.

¹⁴ Má kwa naa ura ni cenaaka názu njá ankwa kwarakursá njere am wakita na wá, diyaweddiye edda-aara ba shagera, yawánya tate-aara, geni a jejja zherwe.

¹⁵ Amá wá, eksauka áte kelaadire; ekkure wá, bawanánba áte njá á egdza mamire.

Use antara barka am halavuwa á elva-aha

¹⁶ Yaakadada wá, edda á hairire ba njane. Ma vaatara keni a vakurteva hairire áte una a disaa njane; a yákuraaka deme Yaakadada.

¹⁷ Náwa una wá, yá ankwa puwaná ba iya Paul an erva-aaruwa mazla-aara ge gakur use-aaruwa zlabé ádaliye, ba seke una ni yá magán ba estuwa am wakita-aha-aaruwa bademme na. Kwaye njane fantefa erva-aaruwa áhuna.

¹⁸ A hyetehye ngurna á Yaakadada Yaisu *Almasiihu áte kure bademme á kure.

Wandala
The Holy Bible in the Wandala language of
Cameroon
La Bible en wandala

copyright © 1999 Wycliffe Bible Translators, Inc.

Language: Wandala

Contributor: Wycliffe Bible Translators, Inc.

All rights reserved.

2025-05-13

PDF generated using Haiola and XeLaTeX on 13 May 2025 from source
files dated 13 May 2025
dec75dd5-4784-5059-aa00-668d508a6b0d